

## **Pol da Pilipai Amin do Papia Mandagit**

*But p̄iso gen*

Pol tap pakbi idap pudanek wasok wasoksi Yurop mīktim kin̄ altagit bisapmon, Pol kin̄ Masadonia Provinskon kokup pap Pilipai un̄udon Gen Bin Tagisi yan̄ ten̄tenagit (Yabekbi 16.8 40 un̄udon koki). Don ae kokup kindakon pan̄ki egakwan dam tebanon yip̄gwit. Amin da dam tebanon Rom bo egip̄gut yan̄ nandan̄. Dam tebanon egip̄gut bisapmon amin di da Pilipai pan̄muwukbi dakon nandan̄ gadat pan̄upbal ak do nandan̄ dakon geni nandagit. Nandan̄ek un̄un gen do butjik nandagit, mani iyi dam tebanon egip̄gut un̄un do butjik dima nandagit. Pol un̄un Yesu do nandan̄ gadat anek but galaksi nandagit.

Kalip Pol monej ae yo kabi do wadak wadak aban Pilipai amin da an̄puluganek monej yopba kiwit. Do Pol da on papiakon but galak gen mandagit. Ae dam tebanon egakwan nandaba kik anek but yokwi nandani yan̄ do nandan̄ gadatni pan̄teban agit.

Pol da Pin̄kop da but galak do yo madep yomgut un̄un do yoyisak. Un̄un egip̄ egip̄ kalugi Yesu Kristokon nan̄ abidawit un̄un do yoyisak. Yan̄ yoyisak, un̄un Juda amin dakon gen teban yolek un̄un kosiron da but galak dakon yo un̄un dima abidawit. Yesu kalon nan̄gin nandan̄ gadan̄ im̄nek abidawit. Pol un̄un Pilipai amin da Kristo dakon an̄pak abidan̄ kimagek yoyin̄det toptopmi do kan̄

kimotni do nandisak. Kristo unun iyi do amin madep yan nandanek iyi dakon galaktok dima yolgit. Unun iyi pinbisi egek Pin kop da pi imgut unun banjin agit. Pol da yan yosok, minat aminyo Kristo gat gadan kimagek ekwan unun da Pin kop dakon but yawot abidanek kisik kisik ekwan.

On papia manjiki bisapmon Pol Pilipai panmuwukbi do but dasi galaktan yomisak yanji kokdisal.

*Pilipai amin da Pol gat gadat gadat awit do Pol but galaksi nandagit  
(Kilapmi 1-4)*

<sup>1</sup> Nak Pol gat ae Timoti gat nit Yesu Kristo dakon pi monjini. Nit papia on Yesu Kristo dakon minat aminyo morap kisi kokup pap Pilipai ekwan ji do mandamak. Ji gat ae panmuwukbi unun dakon kila amin gat ae pi amini ji do mandamak.

<sup>2</sup> Pin kop Datnin gat ae Amin Tagi Yesu Kristo gat da ji do nandan yawok daminek panpuluganbal butji yawori tosak.

*Pol da Pin kop ya yan iyigit*

<sup>3</sup> Ji do nandisat bisap morapmon Pin kopno ya yan iyisat.

<sup>4</sup> Ji do bisit asat bisap morapmon nak kisik kisigon da asat.

<sup>5</sup> Nido Gen Bin Tagisi wasanek nandawit gildaron da win abisok ekwamanon ji da nak anpuluganba Gen Bin Tagisi unun dakon yan tenjenok pi aman.

<sup>6</sup> Nak yanŕsi nandisat, Piŕkop da jikon pi tagiŕsi wasagit uŕun sanbenek anan kinakwan Yesu Kristo da tobił apjak bisap madepmon wasip akdisak.

<sup>7</sup> Ji uŕun nak da but kagagwan ekwan, do asi nak but dasi galak tan damisat. Piŕkop da nandan yanwotni do anek nak gat ae ji gat kisi yo tagiŕsi nimiŕn nimiŕn asak. Dam tebanon egisaron, bo wanŕga egek Gen Bin Tagiŕsi ankutnanek anteban asaron, nandan yanwotni do anek panpulugok madepsi asak.

<sup>8</sup> Piŕkop da nandisak, Yesu Kristo da amin do but dasi galak tan yomyomni uŕun nak da buron yipgut da tanakwan nak ji kisi morap dandak do tagiŕsi nandisat.

<sup>9</sup> Nak ji do bisit yan asat: Jikon amin do but dasi galak tan yomyom anpak uŕun sigin madepsi anakwa pap tosak, ae nandak nandakji gat ae nandan kokwinji gat tagiŕsi tan damjak.

<sup>10</sup> Anakwan anpak morap nandan kokwin anek anpak tagiŕsi banŕn pan egipni. Anek Kristo da tobił apjak bisapmon ji wagil gwaljiŕgi mini ae diwarisi mini egipni.

<sup>11</sup> Ae anpak kilegi dakon bami Yesu Kristokon da abisak uŕun da jikon tugosak. Anakwan amin da kanek Piŕkop man madep iminek ankisini.

*Pol dam tebanon egipgut, uŕun da Gen Bin Tagiŕsi anteban agit*

<sup>12</sup> Not kabino, yanŕsi nandani. Dam tebanon nepman uŕun da Gen Bin Tagiŕsi dakon kosit sopsop dima asak. Uŕun da Gen Bin Tagiŕsi anreŕn asak.

13 Emat amin morap gapman dakon kila amin madep dakon yut on kila anek ekwan gat, ae miñat aminyo diwari gat da nak Kristo yoldat unun do anek dam tebanon nepman yan kili nandawit.

14 Panmuwukbi not morapmi unun da nak dam tebanon egisat yan nandawit, do Amin Tagi da butni pan-teban aban pasol pasol yipmanek Pin-kop gen yan ten-tenok do pi tebaisi an.

15 Asi, Kristo dakon gen yan ten-tenok an amin diwari da nak do nandaba yokwi tok anek abin nepmanan, nido nak Kristo do yan ten-tenok tagisi asat dakon man tan namisak. Mani diwari nak da pi asat unun do but galaksi nandanek ununyo kisi da Gen Bin Tagisi yan ten-tenon.

16 Unun amin nak but dasi galak tan naminek yan ten-tenok pi an, nido Pin-kop da nak Gen Bin Tagisi an-teban aben do dam tebanon nepgut yan nandan naman.

17 Mani amin diwari man madep timit do pi anek Kristo dakon gen yan ten-tenon. Nandak nandakni tagi dima. Nak dam tebanon egapbo jig di gat sanbenek nam do anek an.

18 Butni tagisi tanakwan yon bo butni tagi dima tanakwan yon nak unun do nandaba kik dima asat. Yo madep unun Kristo dakon Gen Bin Tagisi yan ten-tenon. Nak unun do but galaksi nandisat, ae don but galak madep sigin nandaken.

*Pol dima kimagek sigin egek Pilipai amin panpulugok do nandagit*

19 Asi nak but galaksi nandanek egipben. Nido, ji da nak Pin-kop da anpulugan-akwan Telagi Wup

Yesu Kristo da yabekgit unun da nandan gadatno anteban asak do bisit an yan kili nandagim. Yan an do nak nandisat, abisok yo noman tan naman unun da nak anpulanganban tagisi egipdisat.

<sup>20</sup> Nak but galaksi nandanek yan si nandisat: Nak mayaktok aripmi dima paken. Nikba kimokgen do yoni kan, nak teban tanek naga anpak asat unun anpak nangin yolek Kristo ankisiken. Bo egipben do yoni kan, anpak morap asat unun da Kristo man madep imjak yan si nandisat.

<sup>21</sup> Nak yan si nandisat: Egipben bisapmon yo morap aben unun da Kristo man madep imdisak. Ae kimokgen kan, abisok egip egip asat unun si yapmanek yo wukwisi abidokdisat.

<sup>22</sup> Nak dima kimagek sigin egipben kan, Kristo dakon pi abo bam tagisi tokdan. Egipben bo kimokgen? Ni kosit da tagi asak unun dima nandisat.

<sup>23</sup> Jigisi nandisat, nido nandak nandak bamori asat. Kinda unun yan: Nak kimagek egip egipno yipmanek kiko Kristo gat egip do nandisat. Unun da miktimon egip egip yapmanek wukwisi asak.

<sup>24</sup> Mani miktimon egek ji panpulugoken kan, unun da tagisi asak.

<sup>25</sup> Asi, Pin kop da miktimon egipben do nandisak unun nandan gadan kimokdot. Miktimon ji gat egek panpulanganapbo nandan gadatji teban tanakwa but galaksi nandani yan si nandisat.

<sup>26</sup> Do nak don jikon aeno abin altan damdisat. Anapbo ji nak do but galak nandanek Yesu Kristo ankisini.

*Piŋkop da Pilipai amin jigiyoy kisi pani do nandisak*

<sup>27</sup> Yo nianen di noman tan namni unun do dima nandani. Yo madep unun ji disi anpak kilegi anek Kristo dakon Gen Bin Tagisi guramik kimotni. Yan anakwa nak abin ji dandaken, bo dubagikon egek genji gin nandaken kan yansi nandaken: Ji but kalonon da tebai agek Kristo dakon Gen Bin Tagisi nandan gadani do amin pantagap ak do pi an yan nandan daben.

<sup>28</sup> Ji uwalji do dima pasolni. Uwalji do dima pasolni kan unun da yan yolisak: Piŋkop da ji yokwikon ban pulugan depdisak, mani uwalji si pasildan.

<sup>29</sup> Piŋkop da ji do tagisi nandanek Kristo nandan gadan imni do bikbik damgut. Ae unun gin dima, Kristo dakon man do jigiyoy kisi pani do nandaban tagisi asak.

<sup>30</sup> Nak gat ji gat kisi Kristo dakon man do anek jigiyoy paman. Kalip nandanakwa jigiyoy pagim da ae sigin pasat dakon geni disi nandan.

## 2

*Nin but kalonisi egek amin do anpak tagisi an yomney*

<sup>1</sup> Ji Kristo da butji panteban anakwan bo akgan? Ji but dasi galak tan damisak do butji yawori bo tosok? Ji Telagi Wup da egip egipmon but kalon anek bo ekwan? Ji not do but dasi galak tan yominek bupmi nandan yoman, ma?

<sup>2</sup> Yanj kanj ji nandak nandak kalonji banjin panj egipni, ae not do but dasi galak tanj yominek but kalonji egipni. Yanj ani kanj, nak dakon kisik kisik madepsi pap tosak.

<sup>3</sup> Ji disa dogin nandaba kik anek yo dima ani, bo man madep pak do anek yo dima ani. Amin diwari do gawak yominek man madep yomni.

<sup>4</sup> Disa dogin dima nandani. Amin diwariyo kisi tagisi egipni do nandani.

*Kristo pinji ekwan Pinjkop da anenakgit*

<sup>5</sup> Ji Yesu Kristo da nandak nandak pagit yanj gin pani.

<sup>6</sup> Yesu unun iyi Pinjkop egipgut, mani Pinjkopmon egip egipni unun tebai dima abidagit.

<sup>7</sup> Unun yipmanek oman monji kinda dakon anpak yolek amin daganek altagit.

<sup>8</sup> Amin da kanba aminsi egipgut. Aminsi egek don gawat gawat anek Datni dakon galaktok yolek kimakgit. Asi, gen guramigek tilak kindapmon si kimakgit bisapmon mayaktok madepsi pagit.

<sup>9</sup> Yo yanj agit do Pinjkop da Yesu dakon man madepsi anenagek kwensi yipgut. Man madep imgut unun man morap diwari yapman mudanek man wukwisi kinda imgut.

<sup>10</sup> Pinjkop da yanj agit nido amin morap Kwen Kokupmon ae miktimon ae amin kili kimakbi ae wup miktim kagagwan ekwan unun kisi da Yesu dakon man madep do anek njwakben an imni yanj do agit.

---

**2:3:** Gal 5.26    **2:4:** 1Ko 10.24    **2:6:** Jn 1.1-2; 17.5    **2:7:** Jn 1.14; 2Ko 8.9    **2:8:** Ibr 5.8; 12.2    **2:9:** Ya 2.33; Ep 1.20-21; Ibr 1.3-4    **2:10:** Ro 14.11

11 Nwakben aŋ imiŋek amiŋ kisisi da yaŋ yokdan, “Yesu Kristo uŋun Amin Tagi.” Yaŋ yaŋakwa Piŋkop Dat da man madep pasak.

*Nin miŋat amiŋyo da binapmon tenŋeni ton da ekwaman*

12 Not kabinosi, kalip nak ji gat egapbo geno nandanek guramikgwit. Abisok nak ji gat dima ekwaman, mani yaŋ dayisat, ji nak da abisok gen on mandan damisat uŋun guramik kimotni. Piŋkop da ji yokwikon ban timikgit, do pasal nimnimikyo anek pi madepsi anek Piŋkop da ji do but galak do wup dakon yo tagisi timitni do manjigit uŋun timitni.

13 Yaŋsi ani, nido Piŋkop da iyi jikon pi asak. Uŋun da geni guramitni do ji dakon but panŋagap asak, ae galaktokni yolni do tapmam damisak.

14 Yo morap anikon, nandaba yokwi tok anek gen emaron da dima ani.

15 Yaŋ ani kaŋ, miŋat amiŋ morap da dandaba gulusunji mini ae yokwisi mini da egipni. Miktimon yokwi pakpak amiŋ uŋun da binapmon egek Piŋkop dakon monjini gwaljigi mini egipni, ae gik da yaŋ tagisi tenŋeni.

16 Miŋat amiŋyo panpuluganek egip egip bamisi egipni do Piŋkop dakon Gen Bin Tagisi yoyini. Yaŋ ani kaŋ, don Kristo da tobil miktimon apjak bisapmon nak but galaksi nandakdisat. Nido pi madepsi jikon agim uŋun pi isali dima asak.

17 Nandan gadatji uŋun paret yombem kindan Piŋkop do iman. Ae naga jigip pasat uŋun da



Pinkop do paret anek wain tagalgaŋ unun yombem asak. Yan do anek but galaksi nandisat.

<sup>18</sup> Do jiyo kisi nak gat but galak nandanek egipnen.

*Pol da Timoti Pilipai yabekban kisak do yagit*

<sup>19</sup> Amin Tagi Yesu da kosit aban pisosak kaŋ, kili ununjok Timoti yabekgo jikon opdisak. Don ae tobil apjak bisapmon ji niaŋ ekwan dakon gen bin nandanek unun gen da kisik kisik namjak.

<sup>20</sup> Timoti yombem amin di nak gat dima ekwamaŋ. Unun ji niaŋ ekwan ae ji panpulugok do nandak nandak madepsi asak.

<sup>21</sup> Amin diwar i yi dogin nandan. Yesu Kristo dakon yo do dima nandan.

<sup>22</sup> Mani ji Timoti unun amin kilegisi unun pakyaŋsi nandan iman. Monji da dat panpulugon unun da tilak Timoti da nak anpuluganban Gen Bin Tagisi yan tenjenomak.

<sup>23</sup> Mibiltok yo noman tan namdan unun pindagek don Timoti tepmisi yabekgo opjak.

<sup>24</sup> Ae Amin Tagi da anpuluganban naky o kisi donjok obin dandaken yaŋsi nandisat.

*Pol da Epaprodaitas yabekban Pilipai kisak do yagit*

<sup>25</sup> Mani abisok Epaprodaitas nan yabekgo jikon tobil opjak do nandisat. Unun notno ae pi isalno. Nit Amin Tagi dakon emat amin ekwamak. Ji da yabekba nagon obin nak anpulugagit.

<sup>26</sup> Epaprodaitas ji dandak do tepmisi nandisak, ae but yokwi yo kisi asak, nido sot madepsi

da abidagit dakon geni ji kili nandanek bupmi madepsi nandawit, mibili yan do bupmi nandisak.

<sup>27</sup> Unun bamisi. Sot obisi anek palisi kimakgit, mani Pin kop da bupmi nandan iminek anmilip agit. Ae nakyo kisi bupmi nandan namgut. Nido kimakgit tam nak but yokwi madepsi nandakom.

<sup>28</sup> Do jikon yipbo opjak do tagisi nandisat, nido ji unun aesi kanek but galaksi nandanek egipdan, ae nak dakon but kisi yawori tokdisak.

<sup>29</sup> Jikon abin altosak bisapmon kisik kisik anek Amin Tagi da manon da abidoni. Asi, unuden amin do man madep yomni.

<sup>30</sup> Nido unun Kristo dakon pi anek palisi kimakgit. Ji nak anpulugok do nandawit, mani Epaprodaitas da ji da tamokon obin nak anpuluganek pali kimakgit.

### 3

*Amin kinda Kristo nandan gadan imisak unun amin kilegi*

<sup>1</sup> Not kabino, wasip do yan dayisat, ji Amin Tagi dakon minat amin kabini do kisik kisik ani. Kalip papia diwari ji do mandan damgum unuden ae mandak do dima kurak tosot, nido gen unun da ji panpulugokdisak. Gen unun yan:

<sup>2</sup> Amin diwari yan yon, gak Pin kop da amin kilegi yan gayisak do nandisal kan, giptim mandak dakon anpak yolek abi. Yan yon amin jon pinan yokwi yombem. Nandak nandakni yokwi ae anpakni yokwi, do unuden amin do kan kimotni.

<sup>3</sup> Nido nin dagin Pin̄kop dakon amin kabi bamisi ekwaman̄. Nin Pin̄kop dakon Wup da tapmimon Pin̄kop gawak imaman̄, ae Yesu Kristo da nin do yo madepsi agit unun do nandanek man madep imaman̄, do Pin̄kop da nin dogin nandaban kilek tosook. Nin da pi kinda ano Pin̄kop da nindaban nin amin kilegisi aman̄ unun dakon kosit kinda dimasi tosook yan̄si nandaman̄.

<sup>4</sup> Nak naga kalip Pin̄kop da in̄amon amin kilegisi egipben̄ do amin diwar̄i yapman̄ek pi madepsi agim. Do man madep pak do nandisat kan̄ tagi paken̄.

<sup>5</sup> Nido, men̄ da an̄alan̄ban gildat 8 yan̄ mudan̄akwan mukwa sogok amin da giptimno mandawit. Nak Israel amin kinda, Benjamin da kabikon nani. Nak Ibru aminsi kinda, nak Ibru amin dakon yawi diwatsi. Nak Parisi kabikon nani kinda, nak gen teban morap guramik kimokdot.

<sup>6</sup> Nak Pin̄kop dakon pi madepsi an̄ek miñat aminyo Kristo nandan̄ gadan̄ imgwit obisi pañupbal agim. Ae Juda amin dakon gen teban yolapbo gulusun̄o kinda dima kawit.

<sup>7</sup> Kalip unun yo morap an̄apbo mano ton̄ ae unun da an̄pulugan̄ban Pin̄kop da nandaban kilek tosook yan̄ nandagim, mani abisok koko yo isali asak. Abisok nak Kristo dogin nandisat.

<sup>8</sup> Asi, yo morap ak do nandagim bo ae yolapbo Pin̄kop da kan̄ban kilek tosook yan̄ nandagim, unun wagil yo isalisi. Nido, Amin Tagino Yesu Kristo nandan̄ im̄isat unun do nandako yo bamisi asak.

Do nak anpulugok do yo agit, nak unun do nandanek Kristo dakon anpak abidagim. Ae nandak nandaknokon da kalip yo diwari yolek agim unun yo isalisi yan nandisat. Yesu Kristo nanjin tebai abidanek

<sup>9</sup> iyikonsi egipben do nandisat. Nak gen teban tagisi guramikdat do Pinjop da inamon nak amin kilegisi yan dakon nandak nandak dimasi pasat. Nak Kristo nandan gadan imisat, anapbo Pinjop da amin kilegi yan nayisak.

<sup>10</sup> Kristo pakyanji nandan im do nandisat. Unun kimagek aeni pidagit, do tapmimni nagon tosak do nandisat. Ae tepmi pagit unuden gin paken do nandisat. Ae kimot do anek nandak nandak pagit unuden gin paken do nandisat.

<sup>11</sup> Nido, Pinjop da nakyo kisi kimoron nan aban pidoken do nandisat.

### *Pol si teban tanej timtim yanek tilagonsi kisak*

<sup>12</sup> Nak Kristo dakon anpak unun kili abidanek aripnosi anapbo Pinjop da gulusunno kinda dima kosok yan dima nandisat. Mani Yesu Kristo pakyanji nandan imim anpak unun nan yoldat. Nido, nak iyi do manjigit bisapmon anpak unuden aben do manjigit.

<sup>13</sup> Not kabino, nak Kristo pakyanji nandan imim anpak unun kili abidagim yan dima nandisat. Mani napbi gwapbo kindakon agisat yan nandisat. Yo kalip agim unun do nandak nandak dima asat, nak yo morap don noman tokdan unun do nandak nandak ban asat.

14 Nak tapmimno kisi paregek timtim yanek tilagon kin altanek tomnino unun abidoken do pini asat. Tomni unun yan: Nak Yesu Kristo pakyanji nandan iminek Pinkop dakon yan ilit yolek Kwen Kokupmon wigiken.

15 Pinkop dakon yo do nandak nandakji amin bami dakon tilak yombem kan, nandak nandakji nak dakon gat arip. Ae jikon da diwari nandak nandakni nwanjwari tan yoman kan, Pinkop da nandak nandak unun panmilip anjakwan galaktokni yolni.

16 Yo madepsi unun yan: Pinkop da ni anpak yolnen do kili niyigit unun tebaisi timigek yolnen.

17 Not kabino, ji nak dakon anpak ban yolek ani. Nin ji gat egipguman bisapmon anpak tagisi anapano amin diwari da pindagek yolgwit. Ji unun minat aminyo banji pindak kimagek anpakni unun si yolni.

18 Nido, minat aminyo morapmi da Kristo dakon tilak kindap do uwal anek anpak yokwisi an. Bisap morapmi minat aminyo unuden do kili dayigim, ae abisok dabil pakbino si manakwa anpak yokwi an unun do aeno dayisat.

19 Giptim dakon galaktok da pinkopni asak. Ae anpak diwari amin da mayaktok pakpagi unun ban anek iyi do nandaba tagisi asak. Unuden amin miktim dakon yo morap dogin nandan, do Pinkop da panupbal aban Tipdomon pigikdan.

20 Mani nin Kwen Kokup dakon minat aminyo ekwaman. Nin Amin Tagi Yesu Kristo yokwikon

banj timit timit aminin da Kwen Kokupmon da pisak unun do nandan teban tanek jomjom aman.

<sup>21</sup> Unun da iyi dakon tapmimon da yo morap kila asak, ae on miktim dakon giptimnin kulabik aban iyi dakon giptim yombem wagil tagisi akdisak.

## 4

*Nin but kalon anek, kisik kisik anek, nandak nandak kilegi timigek egipnen*

<sup>1</sup> Not kabino, nak ji do but dasi galak tan daminek ji abin dandak do tagisi nandisat. Anek but galak madepsi nandisat, nido ji Kristo nandan gadan imgwit. Pi madep agim dakon tomnino unun ji mani. Notnoni, ji gen abisok dayisat unun da aripmon tebaisi atni.

<sup>2</sup> Yuodia gat ae Sintiki gat yanisi dayisat, jil Amin Tagi nandan gadan imamal do jil pidok pidok yipmanek but kalon anjil.

<sup>3</sup> Ae pi isalno tagisi, gak minat bamot unun panpuluganbi but kalon anjil do gayisat. Nido nak gadan nabal Gen Bin Tagisi yan tenenok do pi madepsi agiman. Ae Klemen gat ae nak dakon pi isalno diwari gat kisi da pi agiman. Unun amin kabi dakon mani unun egip egip teban papiakon tan yoman.

<sup>4</sup> Bisapmi bisapmi Amin Tagikon gadanek kisik kisik ani. Aeno dayisat, kisik kisik anek egipni.


<sup>5</sup> Anpak yaworisi anek egakwa amin kisi da anpakji tagisi pindatni. Nandani, Amin Tagi kilisok unun apdisak.

<sup>6</sup> Ji yo kinda do nandaba kik dimasi ani. Bisapmi bisapmi jigisi do nandanek Pin kop iyini. Bisit iyinek, ya yan iyinek, panpulugosak do iyini.

<sup>7</sup> Yan ani kan, Pin kop dakon but yawotni jikon tosak. Unun but yawot amin nin da mibili aripmi dima nandan pisonen. But yawotni da butji ae nandak nandakji pan kutnanban Yesu Kristokon gadanek tagisi egipni.

<sup>8</sup> Not kabino, nak mibi gen kinda gat dayisat, unun yan. Bisapmi bisapmi ji unun dogin nandani: anpak bamisi, ae tagisi ae kilegisi, ae anpak wagil jimjimi minisi, ae yo gwaljigi minisi, ae yo tagisi morap, ae anpak nomanisi, ae anpak tagisi morap amin da aba pindatnen do tagisi nandaman, ji yo unuden dogin nandanek egipni.

<sup>9</sup> Nak anpak morap ani do dayin dekgo nandawit, ae anpak morap abo nandawit, unun anpak morap ji bisapmi bisapmi an kimotni. Anakwa Pin kop but yawot ami da ji gat egipjak.

*Pol da Pilipai amin da but galak do yo yopmanimgwit unun do but galak nandagit*

<sup>10</sup> Ji da nak anpulugok do yo ayin unun do tagisi nandanek Amin Tagi an kisisat. Asi, ji kalip nak do nandawit, mani nak anpulugoni dakon kosit kinda dima tan damgut.

<sup>11</sup> Nak da yo do wadanek gen on dima dayisat. Nak nandak nandak yan nan kili nandako pisagit: Nak yo kabino morapmi bo morapmi dima, unun do nandaba kik dima asat, kisi tagi gin yan nandisat.

<sup>12</sup> Bupmi aminsi egipben bo ae yo kabino morapmi panek egipben, unun kisi tagigin. Jap do anek egisat, bo butno tugon unun yo isali.

<sup>13</sup> Nido, Kristo da tapmim namajakwan yo morap tagi aben.

<sup>14</sup> Asi, ji da nak anpulugok do yo yopba opni do dima nandagim. Mani, ji anpak tagisi anek nagon gadaŋba jigi kaloni panek nak do yo yopba apgwit.

<sup>15</sup> Nak kalip Masadonia miktimon agek Gen Bin Tagisi dayiko ji nandaŋ gadaŋek panmuwukbi kaluksi awit. Pilipai miŋat aminyo disi nandaŋ, Masadonia miktim yipman dekgim bisapmon panmuwukbi miŋat aminyo kokup nwanjwarikon nani di da monej di nak anpulugok do dima yopman namgwit. Ji dagin nak do yan awit.

<sup>16</sup> Kokup pap Tesalonaika egapbo ji da monej ae yo di nak anpulugok do bisap morapmi yopman namgwit.

<sup>17</sup> Yan yanapbo but galak do ji da ae anpulugoni do yosok yan di nandabam. Dima. Ji anpak tagisi sigin anakwa Pin kop da unun do tagisi nandisak do nandisat.

<sup>18</sup> Ji da yo morap Epaprodaitas da kisiron da yopba apgwit unun kili timikgim. Abisok yono tugok tugogisi. Unun but galak dakon yo yopman namgwit unun paret kibanj tagisi yombem nan ji da Pin kop do imgwit. Pin kop da paret unuden do galagisi nandisak.

<sup>19</sup> Ae Pin kop da yo morap nido wadak wadak an unun aripjikon damjak, nido Pin kop dakon yo tagisi morap unun Yesu Kristokon ton, do asi damdisak.



<sup>20</sup> Piŋkop Datnin mani dagok dagogi mini aŋkisiŋ kimotneŋ. Uŋun asi.

*Pol da Pilipai amin do gildat tagi yaŋ yoyigiti*

<sup>21</sup> Yesu Kristo dakon miŋat amin morap do gildat tagi yaŋ yoyini. Paŋmuwukbi notnin nak gat idon ekwaman uŋun kisi da ji do gildat tagi yaŋ dayan.

<sup>22</sup> Ae Piŋkop dakon miŋat amin morap da gildat tagi yaŋ dayan. Diwari kila amin madep Sisa da yut papmon pi aŋ, uŋun da nak da gildat tagi yaŋ dayiken do gwayan gwayan tebai nayan.

<sup>23</sup> Amin Tagi Yesu Kristo dakon nandan yawotni ji da wupmon tosak.

**PIN<sup>K</sup>OP GEN**  
**The New Testament and Psalms in the Yopno Language**  
**of Papua New Guinea**  
**Nupela Testamen na Buk Song long tokples Yopno long**  
**Niugini**

copyright © 2010 Wycliffe Bible Translators, Inc.

Language: Yopno

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-01-09

---

PDF generated using Haiola and XeLaTeX on 18 Apr 2025 from source files dated 31 Aug 2023

b683ce50-d820-5bfc-8471-d8ee080be106